

दिनांक 31.05.2025

समय: 18.45 बजे

आकाशवाणी जयपुर-अजमेर  
प्रादेशिक समाचार

- प्रधानमंत्री नरेन्द्र मोदी अहिल्या बाई होल्कर जयंती समारोह मांय कह्यो-सरकार महिलावां री अगुवाई मांय विकास ने बधावो दे रही है।
- केन्द्रीय स्वास्थ्य मंत्री जगत प्रकाश नड्डा जयपुर मांय राखी ज्या महिला सशक्तिकरण सम्मेलन मांय न्यारी-न्यारी सौगातां दीनी-चिकित्सा विभाग री मीटिंग ले रह्या है।
- राज्य मांय नागरिक सुरक्षा पूर्वाभ्यास रा तैत आपात हालात मांय बचाव अर राहत री तैयारियां री परखा करी जा रही है।
- प्रदेश मांय केई ठौड़ां उमसभरी गर्मी-हालांकि कठे ई लू रा हालात नी है।

000

प्रधानमंत्री नरेन्द्र मोदी कह्यो है के पहलगाम हमलो भारत री नारी शक्ति ने चुनौती हो जो आ साजिश करण वाळां सारू मौत रो पैगाम साबित व्हयो। वे आज मध्यप्रदेश रा भोपाल मांय राखी ज्या जनसभा मांय बोल रह्या हा। श्री मोदी कह्यो के आतंकी कार्रवाइयां ऊं करड़ाई सागे निपट्यो जावेला। लोकमाता अहिल्या बाई री 300वीं जयंती रे मौके राखी ज्या महिला सशक्तिकरण महासम्मेलन मांय प्रधानमंत्री कह्यो के सिंदूर भारत री वीरता री निशाणी बण ग्यो है अर देश रा इतिहास री मोटी कामयाबी है।

.....

सरकार री जनता रा भला री योजनवां रो जिक करता थकां प्रधानमंत्री कह्यो के लोकमाता अहिल्याबाई रा **नागरिक देवो भवः** मंत्र ने राज मांय काम लियो जा रह्यो है। वे कह्यो के सरकार महिलावां री अगुवाई मांय विकास रा नजरिया ने खास बुनियाद बणा रही है अर सरकार री हर मोटी योजना मांय महिलावां रो खास काम है। प्रधानमंत्री कह्यो के भारत महिलावां ने नुवी तकनीक ऊं दूर राखण रा दौर ऊं बाहर निकळ ग्यो है। ई आयोजन रे दौरान प्रधानमंत्री विकास रा कामां री सौगात दीनी अर देवी अहिल्याबाई होल्कर रा मान मांय डाक टिकट अर तीन सौ रूप्या रो सिक्को जारी कीनो।

000

भारतीय जनता पार्टी रा राष्ट्रीय अध्यक्ष अर केन्द्रीय स्वास्थ्य मंत्री जे.पी. नड्डा आज जयपुर पधर्या। वे कह्यो के प्रधानमंत्री नरेन्द्र मोदी री अगुवाई वाळी केन्द्र सरकार लारला दस साल मांय काम करण री संस्कृति मांय बदलाव कीनो है। नड्डा कह्यो के सरकार सगळां री समुचित स्वास्थ्य देखभाल माथे खास ध्यान दे रही है।

श्री नड्डा महिला सशक्तिकरण सम्मेलन मांय मुख्यमंत्री भजनलाल शर्मा सागे लाडो प्रोत्साहन योजना री सरूआत कीनी। वे 32 हजार 755 टाबरियां समेत न्यारी-न्यारी योजनावां मांय महिलावां

अर टाबरियां ने मदद री रकम भेजी। 17 हजार टाबरियां ने वजीफा अर 19 हजार ऊं बत्ती छात्रावां री फीस री रकम सीधी वां रा बैंक खातां मांय भेजी। एक हजार 800 महिलावां ने लखपति दीदी योजना रो फायदो दियो ज्यो। श्री नड्डा राजस्थान पुलिस री कालिका पेट्रोलिंग यूनिट री डोढ़ सौ कर्मचारियां ने ई रवाना कीनी।

कार्यक्रम मांय केन्द्रीय मंत्री गजेन्द्र सिंह शेखावत, भागीरथ चौधरी अर राज्य रा चिकित्सा मंत्री गजेन्द्र सिंह खींवर ई मौजूद रह्या। ई पाछे वे जवाहर सर्किल कने तिरंगा यात्रा मांय शामिल व्ह्या। ई दौरान मानव श्रृंखला बणा र वां रो स्वागत करी ज्यो। भाजपा रा राष्ट्रीय अध्यक्ष अहिल्या बाई ने याद करता थकां कह्यो के वे मोटी समाज सुधारक ही ,जो महिलावां ने आगे बधावण सारु ऐतिहासिक काम कीना। इण ऊं पैली श्री नड्डा मालवीय नेशनल इंस्टीट्यूट ऑफ टेक्नोलॉजी मांय स्वामी विवेकानन्द री मूरत माथे सिरधा रा फूल चढ़ा र वां ने याद कीना। इण ऊं पैली जयपुर हवाई अड्डा रे बाहर कार्यकर्तावां ने सम्बोधित करता थकां श्री नड्डा कह्यो के ऑपरेशन सिन्दूर अर एयर स्ट्राइक साबित कर दीनो है के गर कोई म्हाणी ओर निजर उठावेला तो वां ने घर मांय घुस र जवाब दियो जावेला।

-----

श्री नड्डा स्वास्थ्य विभाग री समीक्षा बैठक ले रह्या है। मुख्यमंत्री रा रहवास माथे चाल रही मीटिंग मांय मुख्यमंत्री भजन लाल शर्मा अर चिकित्सा मंत्री गजेन्द्र सिंह खींवर समेत केई आला अहलकार ई मौजूद है।

000

**फिट इंडिया संडे ऑन साइकिल पहल** रा 25वां संस्करण ने पूरा देश मांय काल खास तिरंगा रैली रा तौर ऊं मणायो जावेला। केंद्रीय युवा मामलात् अर खेल मंत्री डॉ. मनसुख मांडविया दिल्ली मांय री इण री अगुवाई करेला। ई दौरान केई खिलाड़ी अर मनोरंजन री दुनिया री खास हस्तियां मौजूद रहवेला। युवा मामलात् अर खेल मंत्रालय रे मुजब 3 जून ने विश्व साइकिल दिवस सागे काल रे जरिये कार्यक्रम फिटनेस मांय साइकिल री भूमिका ने बतायो जावेला अर सशस्त्र बलां रा शहीदां ने सिरधाभाव सागे याद कर्या जावेला।

000

कैबिनेट मंत्री जोराराम कुमावत आज पाली जिला रा कोसेलाव, रोजड़ा अर बांकली मांय विकास रा न्यारा-न्यारा कामां री नींव रखी अर पूरा व्ह्या काम जनता ने सूप्या। वे कोसेलाव मांय बर्तन बैंक री सरुआत कीनी।

वे कह्यो के प्रदेश री खास सड़कां माथे ट्रामा सेंटर खोलण माथे खास ध्यान दियो जा रह्यो है अर सांडेराव मांय बेगो ई ट्रामा सेंटर खोल्यो जावेला। सरकार ई सेन्टर सारु चार डॉक्टरां अर दूजा कर्मचारियां री नियुक्ति री मंजूरी दे दीनी है।

000

राज्य मांय आज नागरिक सुरक्षा अभ्यास कर्यो जा रह्यो है। केंद्र सरकार रा हुकम पाछे ऑपरेशन शील्ड रा तैत आ मॉक ड्रिल अर ब्लैक आउट अभ्यास कर्यो जा रह्या है। पैली ओ अभ्यास 29 मई ने कर्यो जावणो हो। गृह मंत्रालय रा दिशा-निर्देशां रे मुजब ई अभ्यास रे जरिये युद्ध अर हवाई हमला रा हालात मांय राहत अर बचाव रा कामा री तैयारियां री परख करी जा रही है। डूंगरपुर रा जिला कलेक्टर अंकित कुमार सिंह बतायो के वठे ई किण ई आपात हालात रो सामो करण रो अभ्यास करी ज्यो।

### **एस.बी. अंकित कुमार सिंह**

प्रशासन री ओर ऊं मॉक ड्रिल अर ब्लैकआउट रे दौरान घरां, दफ्तरां अर मोटर गाड़िया री लाइटों बंद राखण सारु कहीं ज्यो है। ध्यानजोग है के इण ऊं पैली 7 मई ने ई प्रदेश मांय मॉक ड्रिल अर ब्लैकआउट करी ज्यो हो।

000

पहलगाम आतंकी हमला पाछे पूरा देश मांय पाकिस्तानी खुफिया एजेन्सियां ऊं जुड़्या लोगां री तलाश करी जा रही है। दिल्ली पुलिस री स्पेशल सैल डीग ऊं एक ही पिरवार रा दो जणां ने

पकड़या है। गंगूरा गांव रा रहवासी आं लोगां माथे लुकावण लायक जाणकारियां पाकिस्तान ने देवण रो आरोप है। पुलिस आरोपितां रा फोन कॉल्स अर जासूसी नेटवर्क री छानबीन कर रही है।

000

आज विश्व तम्बाकू निषेध दिवस मनायी ज्यो। तम्बाकू काम लेवण री रोकथाम करण अर ई कारण व्हेवण वाळा नुकसाण री जाणकारी देवण सारू विश्व स्वास्थ्य संगठन री ओर ऊं आखी दुनिया मांय कार्यक्रम राख्या जावे है। ई साल री थीम **“अपील का पर्दाफाश : तंबाकू और निकोटीन उत्पादों पर उद्योग की चालों को उजागर करना”** है। विश्व तम्बाकू निषेध दिवस रे मौके प्रदेश मांय ई न्यारा-न्यारा कार्यक्रम राख्यी ज्यो। झुंझुनूं रा सूचना केंद्र मांय जनता ने तम्बाकू काम नी लेवण रो संदेश दियो ज्यो। सीएमएचओ डॉ. छोटेलाल गुर्जर बतायो के तंबाकू काम लेवण ऊं कैंसर, हाई बी.पी., सांस री बीमारियां अर दिमागी बीमारियां व्हे जावे है। वे इण री रोकथाम सारू मिल र कोशिशें करण माथे जोर दीनो।

**एस.बी. सीएमएचओ छोटेलाल गुर्जर**

सवाईमाधोपुर मांय ई मौके विद्यार्थियां सारू न्यारी-न्यारी होड़ां राख्यी ज्यी अर तम्बाकू निषेध रैली निकाली ज्यी।

000

प्रदेश रा ऊगणी हलकां रे अलावा दूजी ठौड़ां आंधी-बारिश मांय कमी रा आसार है, हालांकि राज्य रा कुछ हलकां मांय 2 जून ऊं ओजू आंधी चालण अर गरज सागे बारिश व्हे सके है। ई बीचे भीलवाड़ा अर सिरौही समेत केई ठौड़ां उमस भरी गर्मी ऊं लोग परेशान रह्या। लारला चौबीस घंटां मांय कठे-कठे बिरखा वही। बारां, अजमेर, सीकर, कोटा, टोंक, डूंगरपुर, चूरू अर नागौर समेत कठे-कठे रिमझिम बारिश व्ही। दूजी कानी 9 ठौड़ां दिन री बगत पारो 40 डिग्री सेल्सियस ऊं ऊंचो रह्यो। राज्य मांय किण ई ठौड़ लू रा हालात नी है।

000

सरिस्का बाघ अभ्यारण्य मांय आज-काल गिद्धां रा झुण्ड निजर आ रह्या है। अ लांग बिल्ड इण्डियन वल्चर खत्म व्हे जावण रा कगार ताई पूगी प्रजाति है, जो अब सरिस्का रा जंगलां मांय ओजू घर बणा रही है। सरिस्का रा कुदरती वातावरण मांय गिद्धां री तादाद मांय व्हे रही बधोतरी पर्यावरण संतुलन सारू चोखो इशारो है। सरकार री ओर ऊं डायक्लोफेनेक दवाई माथे लगायी ज्यी रोक पाछे गिद्ध पाछा आवण लाग्या है। सरिस्का रा मुख्य वन संरक्षक संग्राम सिंह बतायो के बरसां पाछे गिद्धां रा झुंड निजर आवणो सरिस्का सारू मोटी उपलब्धि है। हाल ही मांय विश्व वन्य जीव कोष अर वन विभाग री ओर ऊं करी ज्यो सर्वे मांय गिद्धां री रेड हेडेड वल्चर अर इजिप्शियन वल्चर ई सरिस्का मांय निजर आया।

000